



*Dieu fait sanctifier le peuple pour luy bailler les dix Commandemens de la Loy.*



R le troisieme mois d'apres que les enfans d'Israël furent sortis d'Egypte, estans campez près le Mont Sinai, le Seigneur commanda à Moÿse, que chacun d'eux se disposast à se sanctifier & n'approcher de leurs femmes de trois iours, & lauer leurs vestemens, & estre prests au troisieme iour pour entendre sa volonté; defendant d'approcher à peine de la mort, & que nul ne montast à la montagne, sinon Moÿse. Le Seigneur donc apparut en feu flamme & fumée, avec vn son de trompette effroyable, & fit retentir toute la terre; dont le peuple environnant le mont Sinai, trembloit de frayeur, n'outrepassant en rien les bornes à eux prescrites. Lors le Seigneur profera ces paroles. Je suis le Seigneur ton Dieu, qui t'ay tiré hors de la terre d'Egypte, de la maison de seruitude.

- I. Tu n'auras point d'autres Dieux devant ma face, tu n'ete feras tailler aucune Idole ny ressemblance pour l'adorer.
- II. Tu ne prendras point le nom du Seigneur ton Dieu en vain : Car le Seigneur ne tiendra point pour innocent celuy qui aura pris son nom en vain.
- III. Aye souvenance de sanctifier le iour du Babbath, ou Repos ; Six iours tu trauailleras, & feras toute ton œuvre, mais le septieme iour est le repos du Seigneur ton Dieu.
- IIII. Honore ton pere & ta mere, afin que tes iours soient prolongez sur la terre, que le Seigneur ton Dieu te donnera.
- V. Tu ne tueras point.
- VI. Tu ne paillarderas point.
- VII. Tu ne déroberas point.
- VIII. Tu ne diras point faux témoignage contre ton prochain.
- IX. Tu ne convoiteras point la femme de ton prochain.
- X. Tu ne desireras point sa maison, ny sa terre, ny son seruiteur, ny sa femme, ny son bœuf, ny son âne, ny chose qui luy appartienne.